

朝邑縣鄉土志書

宣統二年九月廿六日

陕西省图书馆藏
书号 D631.109.1
原 12524

00770

朝邑縣鄉土志

在昔芮國今之鄉土
謹記舊聞從新述古

歷史

考經史並羣志書互
有同異只可互采

朝邑縣唐大歷三年置

朝邑之名雖創自西魏然
唐初屢變故斷以是年

沿革表

朝代

統部

本縣

未置朝邑縣以前

唐虞

雍州

舜典肇十有二州 蔡傳
中古但為九州禹在堯時
治水作貢亦因其舊舜始



分為十二州
文獻通考顯頊帝創制九州
御批通鑑因之

夏

雍州

禹貢黑水西河惟雍州
愚按韓邦靖朝邑志作冀州
恐據晉獻河西地於秦然亦安知非晉之先吞秦耶
即原晉地疑仍屬雍州

商

雍州

商頌奄有九有式于九圍
孔穎達曰爾雅九州之名與周禮禹貢皆不同疑是殷制

周

王畿

詩桑柔序芮伯刺厲王
孔穎達曰是畿內諸侯為王卿士也

芮國

韓志云殷周時為芮國
路史在朝邑西南

芮伯國

欽定春秋彙纂今同州朝邑縣有芮故城在黃河西岸

又史記晉穆侯七年伐條
長安志條近朝邑

春秋襄王七年

十三年

定王十三年

貞定王八年

秦史記秦歸晉侯夷吾夷吾獻其河西地是時秦地東至河

秦秦穆公滅芮

秦左傳秦桓公伐晉次於輔氏棠纂今朝邑縣西北十三里有輔氏城愚按城在今小伏坡村

王城春秋左傳晉陰飴甥會秦伯盟於王城杜注秦地

馮翊臨晉縣東有王城棠纂今在朝邑縣

臨晉史記秦厲恭公伐大荔戎取其王城築高壘以臨晉

國故名愚按與春秋傳不同

戰國 威烈王十七年

安王十七年

顯王三十九年

秦 始皇二十六年

漢 高帝元年

二年

臨晉元里 魏文侯伐秦築臨晉元里 史記

魏 出子獻公之亂晉復奪河西地三家分晉屬魏 御批通鑑

秦 魏入河西地於秦 史記 御批鑑作二十九年

內史郡 以臨晉懷德屬

塞國 初項羽滅秦封司馬欣為塞王地屬塞國 漢地志

河上郡 分秦內史為渭南河上二郡河上屬者九縣有臨晉 懷德地志

臨晉

臨晉 今大荔朝邑兩縣地 括地志云懷德故城在今朝邑縣西南四十三里

有芮鄉 漢書地理志 臨晉朝邑縣南三十里有南芮鄉北芮鄉 括地志

七年

內史 改二郡復內史 地志

武帝

建元六年

左內史 分內史 地志

太初元年

左馮翊 改內史 地志

新莽

列尉大夫

監晉 改臨晉

東漢

光武 建武元年

左馮翊 關中復置雍州後罷復 置司隸 晉地志

臨晉

獻帝 建安元年

左馮翊

詔分馮翊以西數縣為左內史郡以東數縣為本郡治臨晉 魏畧

魏

馮翊郡 復置雍州 補三國疆域志

臨晉

晉

馮翊郡 雍州 晉地志

臨晉

武帝

大荔 改臨晉 元和郡縣志

東晉 元帝 大興二年

馮翊郡 十六國疆域志

大荔

武鄉 朱廷模朝邑志云於晉時

為武鄉故杜預釋例云馮

翊臨晉東王城今名武鄉

城

孝武
後秦

北魏
太武帝
神麴三年

真君元年

七年

孝文帝
太和三年

十年

馮翊郡
雍州
地形志

華山郡
寰宇記

澄城郡
地形志

分澄城郡置白水郡
地形志

臨晉
改大荔
十六國疆域志

臨晉

五泉

華陰
改臨晉
寰宇記

十一年

澄城郡

廢馮翊置華州治李潤
堡領華山澄城白水
三郡地形志

南五泉

改華陰分五泉縣地置
此地形志

孝明帝
孝昌二年

改華州為東雍州
隋地志

西魏

恭帝
三年

改華州為同州地志

改華山郡為武鄉郡

地志

同州領武鄉澄城二郡

元和志

澄城郡

領澄城朝邑五泉三縣
元和志

朝邑

改南五泉置

廢帝
三年

改為武鄉縣尋廢王兆
鼇志

隋

高祖
開皇元年

三年

澄城郡 仍隸同州仍領三縣

朝邑

同州

廢武鄉澄城白水三郡以
武鄉郃陽夏陽朝邑澄城
蒲城白水下邽八縣隸同
州

朝邑

煬帝
大業初

馮翊郡

廢同州復置此 隋地
志

朝邑

唐

高祖
武德元年

同州

廢馮翊郡復置此領馮翊
朝邑韓城郃陽白水澄城
下邽七縣

朝邑

三年

同州

河濱

析朝邑郃陽兩縣地置
唐書地理志

太宗

貞觀元年

同州

朝邑

省河濱地志

元宗
天寶元年

馮翊郡
改同州
地志

肅宗
乾元元年

同州
改馮翊郡
地志

三年

河西
州
改朝邑縣隸河中府
地志
通典以為武德三年置隸同

既置朝邑縣以後

代宗
大曆三年

同州

朝邑
改河西
地志

五代

同州

朝邑

宋

太祖

同州

隸永興鎮領馮翊郡
宋史地理志

朝邑

隸馮翊郡

金

熙宗
天眷三年

同州

隸陝西京兆路
金史地理志

朝邑

元

世祖
中統三年

同州

立陝西行省治京兆
元史地理志

朝邑

十六年

同州

改京兆為安西路
元地志

朝邑

仁宗

皇慶元年

同州

改安西為奉元路
元地志

朝邑

明

太祖
洪武二年

同州

改奉元路為西安府
明史地理志

朝邑

政績錄

晉

歐陽建字堅石渤海人為政剛果甚有時譽人為之諺曰渤

九年	國朝 雍正三年	十三年
同州 <small>改陝西行省為陝西承宣布政使司</small>	同州 <small>直隸陝西布政司</small>	同州府 <small>升凡十屬</small>
朝邑	朝邑	朝邑

海赫赫歐陽堅石其真操如此

唐

劉幽求武彊人武后聖歷中舉制科中第後授朝邑尉神龍元年張柬之等舉兵討武氏之亂而武三思復為司空幽求謂桓彥範敬暉曰三思尚存公等終無葬地若不早圖噬臍何及不從三思卒復亂唐殺五王景龍元年佐明皇討斬韋后等立睿宗遂以幽求參知機務睿宗將立太子疑不能決幽求曰除天下之禍者當享天下之福平王拯

社稷之危救君親之難論功莫大語德最賢無可疑者上
從之郭元振坐法幽求力救其死卒為名臣世傳幽求墓
在滂谷未之詳也

宋

鄭詒字正臣德安人仁宗時為朝邑令會兵事起民力不堪
詒按簿書裁度調劑以均賦役而民得不困

陳堯佐字希元閬中人知朝邑有善政旋被誣徙去

元

吳珪字玉甫宜陽人至正十六年任朝邑尹廉正愛民在官
九年德惠普施與民相安遂占籍邑之平羅村後遷南鹵
村家焉

明

劉道立字成己杞縣人以進士成化十九年任朝邑故志稱
為政剛果立心平恕除弊興利民無不悅父老言道立十
九歲在任凡九年始終一節後徵為御史歷陝西按察司
僉事

蘇槃字德新南陽人以舉人宏治六年至任居九年志稱廉
謹不擾諸凡善政多所可紀庶幾良吏厚遇學子月給燈
油資夜誦每漏下偕門童步學舍稽勤惰近所未有也

魏傑夏縣人以舉人正德五年至任志稱取與廉潔行縣不
攜里長以市餅自給渴則飲於途

許陳謨吳縣人以舉人正德九年至任單騎而來見事風生
片言決獄號為良吏

王道字純甫陵川人以舉人正德十六年至任善緝盜因太

陽諸里田圯於河白中丞公議從輕額許其折布又朝邑
為孔道不任供送建白得以邵陽澄城夫馬協濟

郃相字立之澤州人以舉人嘉靖三年至任為人廉謹自持
事事有條愛民如子為百姓調停不傷財不害民延名師
教督諸生革除一切弊政尤不宿獄訟曲直立判上官數
游揚以勵鄰封為御史高翔特建表忠祠又為劉烈女建
祠其知大體類如此

歐思誠字純甫薊州人以進士嘉靖十年至任才堪治劇下

車法兩豪強故其稱曰西擒高漢東縛趙都風采凜然而
害民者息焉

郭三仁字商賢蒲州人以舉人嘉靖十三年至任道士華道
益以灘田投獻王府委高同知行勘三仁疾其侵牟百姓
且長投獻風密屬衆庶大譟而前肩同知輿將沈之河三
仁佯怒而解之比事竟田予百姓三仁之力也初三仁以
接壤不受私謁里人服其至公河中疾其太執執持信難
矣哉

劉尚義字伯正汾州人進士以御史嘉靖二十年謫任為人
簡淡純樸居官以靜治又執持不撓以縣城狹小於是拓
東城四門起麗譙人享其利官至河南副使

任希祖字元孝蒼溪人進士以嘉靖二十四年至任為人慈
祥愷悌革除弊政有節用愛人之風厚遇博士弟子員月
為程督多所造就又建白家鎮堡至今為世利政平訟理
鄙相之後一人而已初里人以過柔少之君子謂其嚴不
立威寬不縱弛希祖有焉

畢仕和石首人以舉人三十一年至任潛心理學專務以德
化民訟者聽其和解不肯剖決稍決一事款款動人又雩
而即雨屢雩輒效其誠一如此後轉調去實不持一錢蓋
長者也

郭實字華伯高邑人進士為人方嚴精敏以萬厯十一年至
任發姦摘伏煥若神明大猾斂迹節里甲緩催科農民欣
欣如也邑學舊無泮於是始作又修黌宮廣社學擇師以
教子弟蒲人侵地千頃渡河釐正蒲人譟呼而至不為動

卒正其界縣以東沙積如堂阜遇風旋而蔽天幾不可田
資口食令人覆沙漸成沃壤丁亥歲凶盜將起令行禁止
一境肅然並祀程編修濟於高御史表忠祠更名雙忠增
祀李張二烈女於劉烈女祠更名三烈刻邑紳王學謨所
纂邑志至今考文獻者徵焉任六年擢御史去邑之人如
失慈母云

趙炳字虛白北直隆平人進士性寬平不尚威稜然事有害
於民者爭之上官必得乃已往直指按同州供億派於五

縣韓邵澄白直指不臨其境邑獨供之已重於州而又使
貼州炳曰朝有役同無與今同苦而使朝肩之可乎力陳
其不便遂罷之又議罷條鞭一事條鞭者變一切里役諸
法而盡以銀征其弊利官而病民炳詳為議上之獨不奉
行民受其庇後條鞭法苛大為民害人益服其遠識矣

謝如尚湖廣耒陽人舉人繼趙隆平之後酌其寬而濟之以
嚴懲姦護良邑境清肅有宦使者督織造於秦括取民膏
檄下朝邑絲商若干家充行邑故寡絲貿自吳蜀苟順其

意數十家破產不止也如尚身撻其怒抗而不應又上官
欲陷故保定通判某以屬如尚如尚曰殺人媚人壯夫不
為竟以忤上官意擠之罷去論者恤之然有愛在民久而
彌思與郭趙二公同祠焉

羅任字幼衡光山人舉人機警精吏治能立解紛拏而端正
潔白積穀罰鍰不以奇贏自私摘伏如神剔蠹無少貸邑
之稱神君者必以羅公為首他日量移知耀州州有顯者
修府第役民民苦且怨任野服荷畚鍤往役顯者謝罪役

乃寢其挫強恤民皆此類也王方伯于陞作去思碑謂其
廉仁智斷勤信有六善云

楊紹震字景廉山東東明人萬曆癸丑進士為政卓然不苟
從來縣轄於州州人恃強凌虐縣人紹震因民弗忍請於
上官求直隸府事雖不果行而州禍從此息矣

王時英山西垣曲人以解首舉進士恤下傲上岸然自負而
才足濟之侃侃而談旁若無人無不改容禮重訟牒繁
多應時立決雖急遽中動作從容聲譽大起調繁知長安

迂者戲謂邑人曰公幸值下邑故能立名若到長安恐故
步或失也及至則風裁卓卓加厲於朝論者以為柔不茹
而剛不吐惟公不愧自萬歷末迄今民間道好官猶稱王
解元云

王喬棟字北愚雄縣人以進士天啟六年至任恂恂書生也
善談名理慈祥愷悌時事棘民窮不忍於催科又雅不習
趨承上官遂謝病去民遮留不得泣送載道鐫石以志遺
愛後起復歷任至湖廣督糧參政遇難不屈而死

國朝

楊閔泰山東人順治時至任值兵興後民氣未蘇以簡靜廉
愛與民休息督吏甚嚴皆悚然股栗畏服

羅人琮字紫蘿湖廣桃源人順治辛丑進士以甯波府推官
改令朝邑康熙七年至任慈惠端雅念民疾苦力革宿弊
時郵馬久為民害詳請入厰官養巡檢弓兵十二名隸潼
關衛工食私派朝邑久沿為例又請永革河衝荒地千餘
頃糧額銀三千七百餘兩詳題蠲免皆得如請歲省民財

不貲民呼青天甲寅滇黔逆變羽檄旁午處置有方民不
至大困制府白公亟獎其廉幹公餘課士所賞識者多登
賢書詩歌古文聲馳當時與邑薦紳李河濱王松園劉三
峯倡酬為多邑人謂德政文章我邑賢令推公第一內擢

貴州道御史

陳昌言字禹欽山陰人例監康熙十九年至在任十年修舉
廢墜學宮察院城隍及村鎮社學皆次第營構邑有大事
則集衆詳議而後行故一切不至病民稍遷信陽州牧以

去

王兆鼇字東柱雲南甯州人康熙庚午亞魁四十三年由學
正陞任廉明剛毅才優治劇纂修邑志加論跋初邑中差
糧任里役催納沿弊滋多民力難支兆鼇創立三運擇鄉
之公正者領之又令各運頭於每里舉里長一人經手完
納諸弊盡息民受其澤後陞調河州知州去任時攀轅遮
道至千餘人

永佑滿洲人慈仁簡靜愛民如子緩催科禮賢士凡有訟至

必先令歸使其私為解和如是者再乃為聽斷誠心勸諭
愷切指陳兩造帖服多自追悔以故胥吏蕭寂政簡刑清
又邑有倉糧按年填換民甚苦之佑竟十年未嘗開倉不
以領納苦民民為肖像祀之卒於官樞歸鄉民泣送者如
喪父母至今猶呼永青天焉

謝長清滇南人以進士道光七年至任廉能精敏勤政愛民
甫下車剔革積弊緩徵慎刑尤勤聽斷嘗潛出訪民間匪
徒鼠竊者悉斂迹逃匿創修城內義學龍神祠並養濟院

捐俸千餘金更嚴於課士誠心訓迪不循故套士林奮興
文風為之丕振任朝邑兩次去之日邑人攀轅遮道無不
感戴深恩焉

黃照臨字碧川湖南人舉人同治十三年至任廉潔勤敏政
稍暇即潛至鄉區視民疾苦創立友仁書院延名師教諸
生常躬親訓迪成就頗多聽斷明決兩造甫至即為理問
有可原必曲原原有可釋必速釋之未嘗拖累病民民不
稱冤邑城常平倉地卑溼麥易紅朽按年出換買補攤費

民怨其苦照臨即時稟請藩憲以麥易穀籌定章程永免
填倉外費閭閻至今頌揚不輟口

黃鶚字石臣湖南安化人以舉人光緒二年至任廉正清潔
省刑罰緩催科尤重儒紳有要事必集衆詳議而後行丁
丑歲大饑急為籌賑救活生靈旋以邑內荒地數千畝稟
請上憲暫免差糧又黃河在邑境西徙已久嘉道後衝塌
彌甚征賦如額民苦無可籲告歷五十載前任黃照臨擬
請豁免錢糧事未竟調去鶚初下車力請豁免額糧銀六

百餘兩實惠均沾故任朝邑兩次邑民深感戴焉

兵事錄

夏

后啟征西河

竹書
路史夏有西河
按西河國即縣境

周

桓王十二年秋秦師侵芮敗焉小之也冬王師秦師圍魏

執芮伯以歸春秋左傳

十八年秋秦人納芮伯萬於魏左傳

惠王十七年春虢公敗犬戎於渭汭

左傳 水道提綱渭入河處即古渭汭也

襄王七年晉陰飴甥會秦伯盟於王城

左傳 秦歸晉侯夷吾

夷吾獻其河西地是時秦地東至河

史記

十六年晉侯潛會秦伯於王城秦伯誘瑕甥卻芮而殺之

送衛於晉三千人實紀綱之僕

左傳

十七年秦伯師於河上將納王

左傳 按河上即縣境

定王十三年秦桓公伐晉次於輔氏晉魏顆敗秦師於輔氏

獲杜回

左傳 按今小伏坡村輔氏城旁又有交草村即老人結草處

簡王六年秦晉將會於令狐秦伯不肯涉河次於王城使史
顛盟晉侯於河東晉卻犇盟秦伯於河西左傳

貞定王八年秦厲恭公伐大荔戎取其王城築高壘以臨晉
國更名臨晉史記

威烈王十七年魏文侯伐秦又築臨晉元里史記

赧王二年魏秦會於臨晉史記

十三年秦及魏韓會於臨晉

漢

高帝元年還定三秦賜周勃食邑懷德本傳按懷德在縣境

二年三月自臨晉渡河降魏王豹本紀八月韓信益為疑

兵陳船欲渡臨晉而伏兵從夏陽以木罌缶渡軍本傳

獻帝十六年馬超屯潼關曹公勅諸將關西兵精銳强悍勿

與戰而潛遣徐晃朱靈夜渡蒲坂津據河西為營魏志

晉

哀帝興甯三年苻堅自臨晉登龍門觀晉魏顥結草抗秦師

處前秦錄

孝武帝太元十五年臨晉縣數千戶叛應姚懿姚紹濟自蒲
津擊叛戶大破之晉載記

西魏

文帝大統三年東魏寇龍門屯兵蒲坂造三浮橋渡河文帝紀

按蒲坂之浮橋在縣境

十月周太祖大破齊神武軍於沙苑渭曲

斬首六千餘級降者二萬餘人神武夜遁追至河上復大

克獲

周書文帝紀按沙苑與河皆在縣境

六年二月柔然入寇詔諸軍屯沙苑以備之北史

東魏

天平四年高歡將兵二十萬趨蒲津復引兵自蒲津濟河涉

洛軍於許原西

御批通鑑

北齊

天統中齊將彭樂與宇文護戰沙苑樂飲酒乘醉深入被刺

腸出內之不盡截去復入戰護兵遂敗

本傳

北周

武帝保定四年十月帝幸沙苑勞師

本紀

隋

煬帝十三年唐遣陳演壽史大奈率步騎六千人趨梁山擊

賊孫華等破之留戍永豐倉

唐書本傳
永豐倉在縣境

九月戊午

華陰令李孝嘗以永豐倉來降庚申高祖率軍濟河舍於

長春宮三秦士庶至者日以千數丙寅遣隴西公建成司

馬劉文靜屯永豐倉

本傳

唐

高祖南過永豐倉是夜宿於臨晉洛渭合流之處渡於洛水

上流苦於水淺船行不進其夜三更天甚晴霽忽然覺水
暴長數尺逆流而上船泛深波得達津次乃命所司祀洛

渭並有事於華山

大唐創業起居注
洛渭合流處在縣境

按

武德十二年二月帝如長春宮獵於河濱免朝邑今歲租賦

本紀

肅宗至德二年二月甲辰郭子儀及安慶緒戰於永豐倉敗

之本紀

賊安守忠壁永豐倉子儀遣子盱與戰殺至萬

級盱死於陣進收倉於是關陝道始通

本傳

德宗興元元年八月上命渾瑊駱元光討李懷光懷光遣其將徐庭光以精兵六千軍於長春宮以拒之通鑑

貞元元年馬燧渾瑊破李懷光於長春宮南遂掘塹圍宮城懷光諸將來降 八月賊將徐庭光守長春宮本傳

梁

太祖開平三年四月車駕巡於朝邑冊府元龜

末帝貞明元年梁遣劉鄩攻同州晉遣李存審救之屯軍於

朝邑五代史本傳

明

嘉靖三十二年北兵深入潼關兵使者張瀚移兵駐縣三月

北兵去

崇禎末李自成寇至雷于霖據高阜修泰安堡寨以禦亂本傳

國朝

咸豐三年夏粵匪陷山西平陽初辦團練朝邑練勇防河州

府續

志

同治元年壬戌七月大荔花門變起洩忿鄰邑殺人如麻見

男老稚不留而不屑裹脅勝保軍敗績九月猝圍朝邑縣
城撲城至八晝夜色令托克紳率民勇堅守孤城岌岌將
危時參將王永慶護守朝邑縣城恃以無恐賊轉撲西關
泰安堡至十餘日之久團紳雷五堃練民勇以兵法部勒
堡人捍禦多方礮斃賊無算賊怒乃以全隊來撲寨門門
已焚矣火光燭天百姓急請參將王永慶來援永慶在城
下立斃賊數十賊復合隊圍之永慶復躍登城上號呼兵
民揭屋瓦擊賊屋瓦幾為之盡而城寨卒賴以保全實王

參將之力居多也後以將軍多隆阿軍來勦賊西遁城鄉
稍為解嚴

六年四月朔擒匪為花門所誘突至本境偽燕王魯王等
蹂躪村鎮破堡寨搜崖窰挖地窰在雙泉鎮利其有水草
扎營六七日雖嗜殺不同於回賊而營盤至八十里之寬
威逼婦女焚燬屋宇擄掠民人虔劉邊陲幾至四十餘日
較回賊之殘虐殆又甚焉迨郭寶昌軍來掃蕩羣氛本境
始一律肅清焉

耆舊錄

周

芮伯姬良夫

孔穎達曰芮伯周同姓國畿內諸侯為王卿士

似述先世體國忠貞憂

君無道悲發詩章

見詩大雅桑柔篇

隋

鉗耳文徹大業六年為恆山郡九門縣令邑人頌之為立清

德碑

唐

嚴譔字善思明天文善風角麟德中調襄陽尉親喪廬墓後
擢監察御史武后方任酷吏誅宗室貴戚大臣數百家以
譔為詳審使公直敢言平活八百五十餘人原千餘姓羅
織之黨為之不振

申屠思恭呂昂唐書云事親居喪有孝行者

嚴司業其名莫考天寶中擢宏文生調參江陵府軍事以知
永王璘有異志免去後遷國子司業有從祖姑世父母身
沒絕嗣旅殯在越毀家護葬於其先塋特服其義

安抱玉世居河西沈毅有謀尤忠謹安祿山亂守南陽斬賊
使擢陳穎節度使破史思明封涼國公進司徒卒諡昭武
元

王由義字仲方歷官至禮部侍郎初為徽政院都事能抑內
侍節浮費為御史屢有獻替抗章論衛士縱牧躡民田由
是行營無敢犯者

趙良明宏治中沮水嚙趙氏墓有石曰元皇慶二年旌表孝
子趙良

郭均字叔平至正時由儒林郎尹郿既去民為立石頌德為
政重民務督課農桑開學延師教養子弟有害政蠹民與
不率教者悉伏法一時訟簡盜息鄉村樂與為善引甘谷
水溉田千餘畝常平倉粟至四千斛

明

高翔有文學矜名節洪武中以明經為御史建文時尤戮力
戎事激發忠義靖難後文皇帝召翔翔喪服入見大哭語
又忤旨遂族翔沒其產

程濟為岳池教諭建文初上言某年月日西北兵起廷謂非
所宜言遂下獄已而兵果起赦以為翰林編修充軍師初
濟與高翔並以明經徵翔厲名節濟好奇術及有兵事濟
勸翔學其術翔曰我願為忠臣也金川門破翔召濟同死
難濟曰我願為智士建文急濟從亡每遇險幾不能脫賴
濟力得免從行數十年後莫知其所終

王良洪武中貢入太學厯官刑部右侍郎建文時以議減燕
府人罪謫為浙江按察使燕師入京聞之慟哭誓以必死

會命使召良良執使者將戮以殉忽衆譟奪去良悉收諸
司印嗟嘆久之妻問故良曰吾分應死顧思所以處汝耳
妻曰君為男子乃為婦人謀乎自投水死良遂積薪戶
外閉家人毋得出抱印闔室自焚死

周或洪武中為給事中舉劾無所避諸大臣見或著緋衣即
取青衣為待罪具已而果有論刺遷通政使或有譖其貪
者下獄竟死籍其家惟米數斗布衣數件召訊其妻妻曰
或自嗛不能盡忠故俸稍不入於家寄本司庫中上察其

清忠立誅譖者以俸給其家命沿途有司致祭焉

楊恭洪武進士初為刑科都給事當靖難師起朝議命師問
罪恭疏言宜先遣使講和不宜輒行征討忤旨除為縣幕
成祖即位徵至除陝西布政使恭徒步之官廉得贓吏多
所貶退居九年以廉貞終

周道永樂中為御史征雲南總兵官餽貨寶峻卻之擢山西
按察司僉事有惠政卒於官喪出衆庶遮道哭奠三日不
得行

蕭斌正統進士為通政宅心公恕事不避難門無私謁

楊珪天順舉人任獲鹿知縣以廉謹稱劉瑾用事棄官杜門
謝客瑾敗人服其知幾清操益著

劉偉成化文水知縣邑多豪強前令往往僨事偉以誠心直
道為理衆庶傾心向化境內馴治徵為御史持法平允聞
母病兼程遄歸得母子一訣居喪廬墓三年足迹不至城
市後出為兗州府

韓紹宗字裕後號蓮峰成化進士歷官福建按察副使初在

刑部明敏果斷執法正直不可干以私疏論時政多見俞
允

樊資成化中任滎縣典史歲饑出俸作粥勸設賑濟羣盜嘯
起督繕城池仍單騎往諭之羣盜以平民立去思碑榮之
士大夫遊秦者多登堂拜謁有泣下者

馬驥成化進士汶上知縣廉明方正人不敢干以私可為則
為不避當道竟以此去官山東通志祠名宦中

雷爵成化舉人歷官大名府同知貞廉自持行部蕭然匹馬

果蔬自給時林縣馬郡守謂韓恭簡曰自雷先生貳郡我
雖一言不敢輕發數年得嚴師矣

周瑄成化舉人道之姪順德府通判韓恭簡稱其世濟清白
或介直道宣惠瑄謹篤

王忬字汝器宏治進士為戶部主事出掌錢穀於古北口觀
潮河川難守乃上禦戎策既而請理京衛牧馬草場畜牧
事房山豪民侵牧地按之且急豪民有與援忬不顧曰法
當如是也為員外會詔求直言疏列五十餘事尋為郎中

督儲遼東又條奏邊儲戰陣方略過山海關憲臣以誘殺
勘邊士罪卷又疏言實非誘殺亟行功賞以激士心巡行
諸倉輒疏便宜七事以事被誣謫阿迷州同知歲饑不請
先發以貸飢者擢守和州辨冤抑導水利民戀之立生祠
後為蘇州府同知以直道忤時免歸

韓邦奇字汝節紹宗次子號苑洛正德進士學有本源自諸
經子史及天文地理樂律術數兵法之書無不通究著述
甚富累官南京兵部尚書時稱進無所跲退無所疚卒諡

恭簡詳見明史本傳

韓邦靖字汝慶紹宗三子號五泉正德進士生而靈異號神童拜工部虞衡司主事奉部檄監十庫與奄人抗禮奄人絀服遷郎中詔求真言邦靖乃上疏極言特政缺失天子震怒奪官為民後復起為山西左參議革姦平獄權豪歛迹以前後上疏論列皆不報乃乞歸軍民遮道號泣不忍去著有朝邑縣志

牛斗字應宿正德進士嘉靖初徙兵部武選司郎中冒濫者

賄於當軸兵書力為之地獨難於斗無門可入兵書百計
欲斗為委曲斗執不從終以此告歸

程範字君儀正德舉人判開封府不受餽金賈祝被殺道旁
其事莫測範悉鉤發擒盜人稱神明堅完城池築隄七十
餘里鄉人為立遺愛碑以勁直不容於時公論惜之

王朝雍字仲和盩子正德初授嚴州府推官多所平反作理
刑銘嘉靖改元應詔言事勸上勤學禮下節用恤民行縣
不受餽遺自為市菜和粥人謂之王青菜陞澤州知州庫

人以羨金嘗之立置於法又榜示條約罷不便民者數事
青羊山盜起朝雍紀功隨征勦白當道曰伺險進兵兩省
齊發使盜腹背受敵乃可逞也賊平如其策初軍敗朝雍
陷賊中賊以仁德不忍加害郡人共詣神祈禱比送歸香
煙四十里沿祠祭報進懷慶府同知澤人立去思碑後累
遷按察司僉事

王朝塗字仲冕卷三子進士初授三河知縣能遏權璫捍強
寇以廉能著

王學古字子獲號渭汀嘉靖進士為壽春知縣調廣宗以治
行第一擢判順天府尋遷刑部員外郎見罪人每泣下多
爭獄於上官及調戶部郎中清苦自砥疏辨空頭敕餽賜
忤中官出知漢陽府地衝繁又多盜乃纂簡明圖說檄丈
田均賦役嚴保甲緝盜賊期年大治去官輕裝就道著有

韻覆集

王學模字子揚號河汀學古從弟嘉靖進士初知大谷縣持
已廉潔明於摘發威令大行俗為一變他縣訟不決者皆

願移質大谷遠近稱神累遷左參議分守山西河東稱譽
藉甚然以不能俯仰乞歸同時達人稱其振救窮人力除
貪墨所著有被褐子等集朝邑志八卷

翟吾道字宗儒嘉靖舉人為崞縣令崞故貧瘠健訟而逋賦
抵任數月治理整肅俗不擾而輸賦最有衛輝盜劫官帑
誣連滑縣大姓一縣皆驚吾道抗言證其無辜大姓得免
其剛毅有執類如此

王三省字誠甫朝雍長子嘉靖進士歷官彰德府知府善馭

宗室事事不因循滋弊亦不更張立異務在便民法加於
豪強惠施於惇嫠聲稱益著尋以疾乞歸築太樸園讀書
其中蓋棺時有書數千卷而已

嚴天祥字叔善嘉靖進士初授絳縣三年徵去一錢不著於
身去之日父老遮道攀留者以千數天祥持法不假借常
約束吏胥兢兢不敢縱以此百姓戀之後選為四川道監
察御史

改朝宗字公見嘉靖進士拜給事巡視京營條奏防秋八事

多見施行後知徽州府婺源盜方張曉以禍福皆相悔悟
盜應時解散作諭數十條力行教化訟者至庭導之悔悟
風俗遂變徽人立祠祀之

雷大道字行卿萬厯舉人知廣靈縣歲大侵極意拊綏捐俸
以賑懇荒田數千頃遷兗州府通判署府事核糧儲郤常
例數千金乞養歸性孝友田廬推善者與兄及兄子自取
僅足蔽風雨供饘粥女兄弗瞻迎養五十餘年愛敬如一
日居鄉與物無競好施與遠近咸推尊焉

雷士楨字國柱萬厯進士少穎悟有風節初授太常博士搜
討故實作太常考八卷後遵用焉又修九陵祭器遂簿定
之後巡中城宦官皆相戒勿觸禁已復巡漕運弁多覓京
貴人書求薦士楨無所徇年四十以疾乞歸聚書萬卷日
事校讐四方多就學者性孝友中年益篤每謂子弟惟儉
則窮可以無求達可以助廉及卒家至貧無以營葬焉
郭如魯字唯一進士年十六為諸生時父客死河南裹糧步
險負骸而歸後教諭平遙歲荒盡捐廩米以賑授東昌府

同知攝清源不使內外有所關通加封識以待來者聲望
大起

張徵音字祚康萬歷舉人授河南孟縣作隄以障黃河稱張
公隄調寶豐政務優閒感時稗政作旁觀抵掌等書初在
山右城守禦盜用鉦鼓柝鈴四物辨方向後遵用之知略
輻輳有當世才限於資格不得竟其志

王嗣美字實之萬歷進士授太原推官以明允稱擢南戶科
疏論侃直又條特政缺失忤政府意調山西河南道宗人

暴橫嗣美按發如律藩府歛迹擢江右糧儲參政徵發押
運索耗之弊剔杜一清調補荆南提督時羽流數千人皆
有奧授摘其渠魁正法輿論快焉乞疾歸薦起再補河南
值事急兼攝兵道又條攻守要務矢自効用不報陞山東
按察使予告歸著雜集十二種

王暉如萬厯舉人授鄖陽同知值歲荒為分地立限以賑再
補永平攝欒州特建橫渠祠以倡正學後擢貴陽府經理
蠻部方略輻輳以憂去起補兩浙鹽使奏最為天下第一

雷元善字汝仁萬厯進士少貧牧羊年十八始事讀書知仁
壽縣縣叢盜多豪幾不可治元善挫強剔蠹疾惡如讐不
少假借一歲之間威積四著盜息民安吏皆伏不敢動

李用中字詢堯萬厯進士三仕為令皆有名蹟而內江上蔡
尤號難治用中砥礪廉隅調濟寬猛甚得物情

李朴字季白萬厯進士性忠鯁敢言觀政吏部聞母病請假
不俟報而行擢戶部主事神宗春秋高不視朝前後上書
極論皆不省朴每一疏出人爭傳誦及為郎中疏奏滿朝

傾動光宗在東宮每袖其疏及即位進太僕少卿著有調
刁集雪亭集數卷

王之寀字蓋甫萬歷進士剛毅有大節知無極縣請罷協鄰
驛歲省三千餘金沿河兩岸鑿千餘井灌田又教植柳桑
為鄉約六十餘所里社九十餘學以宏教化後陞刑部主
事首發梃擊案屢陞刑部侍郎見明史

張綸音字作欽萬歷進士累官至湖廣按察副使在官懲姦
蠹詭訟以威稜著而持己廉潔漢口賦無定數乃立限額

不多取朝覲例資千金禁除之緝巨盜百餘人境內肅然
翟事心字鑑寰萬厯舉人言動以禮後知保昌縣撫教篤至
士民甚愛慕建祠祀之著有抱甕集十卷

李聯芳字同春萬厯進士知涓川縣能擒巨盜調真定御史
嚴明積猾見面皆五色無主自奉至廉食雜麥豆屑湯餅
而已

李繼芳字蘭畹聯芳季弟萬厯舉人知三河縣地近京貴戚
中涓率侵奪民田吏多魁黠徵輸增益民大困繼芳手為

盤算濫派毫忽悉除減糧幾三千金請著為令天旱禱於
神有龍蜿蜒見蜥蜴形自以石擊之應手震震大雨霑足
人呼為特雨令

王于陞字文石萬歷進士授戶部主事權稅崇文門嚴御羣
璫寬商旅溢額數千金分毫不以入己超陞郎中督餉薊
州州人思其德祀入名宦歷官岢嵐兵備道流寇掠代城
親率兵戰敗之獲其渠魁特陞布政使予告歸作漫園著
有漫公集時稱達不玷名窮不慚節

成珍字鎮寰萬歷進士初家貧雅自持拾金還主活兩命及
知鉅野縣愛民如子民不忍訟歲饑賑粥躬親調度邑無
死亡調武強時呂公維祺以司理至縣民男女老幼數萬
人求保留哭聲震野呂為涕泗崇祀名宦及在武強遷官
將還士庶涕泣爭送貧無以歸至剝所服帶後屢遷戶部
郎中出知夔州府清直益著方嚴峭厲人皆敬而畏之卒
日貧如洗至無以給喪流寇之亂賊以珍為賢下令敢入

成氏村一隊皆斬

趙勉萬厯舉人有孝行授新蔡令新蔡夙號疲敝力農者希
勉躬詣阡陌指授錢鎛無減家督民始樂業剔姦蠹雪冤
獄卻羨金人服其廉明焉

李楷字叔則號河濱聯芳子天啓舉人少聰敏好古文學築
通帝樓高十丈許命書估日送圖籍手自評隲後知寶應
縣以傲睨中讒謝去歸里值兩臺修陝西通志延至會城
縱飲揮毫每有一作當事者爭付梓名傾海內著有河濱

全書一百卷

王祚字克纘天啓舉人知慶雲縣大兵入境祚誓衆曰我輩
等死耳甯死城中勿死城外也相持十餘日圍得解

上官宏基字孕昌崇禎舉人歷教授陞營山知縣縣故號繁
盛一切供給取辦里民帷帳日一易宏基悉斥罷政尚寬
簡吏胥束手相繼辭去亦聽之不相制署曹肅然卒於官
民如失父母為建祠會祀蜀道險遠貧無以歸爭輸金助
裝遞肩靈輻直踰棧道其遺愛在民如此

雷于霖字午天號柏林崇禎舉人幼貧性孝親沒幾不勝喪

壯好古文學為文奇挺研理聲譽翕集時流寇猖獗倡眾
修泰安堡全活萬人至今賴之順治丙戌土人縱暴入城
知縣宋大儒逃去于霖因以兵法部勒堡人擁官入城城
中響應遂滅賊然卒歸功大儒所著有孝經神授篇西銘
續生篇太極圖說柏林集別世言

王鉞字致甫號松園崇禎舉人知吳橋縣有仁慈聲以不適
時宜歸日以著書講學為事學者翕然宗之著有論孟正
義錄性理三解松園集墨堂集

趙天秩字仲禮生而靈異性端方行不左右顧五經子史一
過目輒不忘尤精易六七歲時誦讀雖暑夜父將農穫而
燈猶未熄每奪其燈成童從苑洛先生遊甚奇之年二十
為諸生尋卒

劉愛字仁夫諸生博學能詩造門從學者屣履常滿人才多
所成就隱居聖山寺十餘年歸老洛濱布衣草食時或弗
給而陶然自樂年九十餘乃終

張恢綱字時憲舉人少為諸生一意稽古肆力羣籍尤究心

理數之學謂邵蔡諸子皆有偏駁於是窮搜互證著參兩
數一書闡前聖未發之蘊正先儒襲舛之失人服其精深
郭肯穫字穉仲崇禎舉人純樸一若不辨權衡讀書無所不
窺時推博雅明運既終隱居不出雷于霖稱其對世也若
木若訥迨世道頻革人皆龍矯已獨鴻冥豈學古無獲者
能之乎弟肯堂棄諸生偕隱逆闖入關中強徵肯穫欲用
之肯穫亡去繫肯堂獄脅致其兄肯堂終不屈卒得兄弟
全節時稱為二難云

國朝

王報春字育萬順治乙酉舉人以教諭遷永年令有循聲告
歸後祀名宦祠其宦蹟詳載永年志中子鵬翼六嗣康熙
辛酉舉人鵬程搏九己卯省元皆有名

郭嶷然字因之順治乙酉舉人以教諭遷知閩清清江昭化
等縣邵金禦盜所在有聲又昭化有女子為盜主交通半
天下前令皆先往致敬乃得相安嶷然執不肯無何女子
來謁偉岸傑黠不可御嶷然怒猝捕下獄募民有訟者既

盈案即弊之獄其黨震散其餘殘民寥寥御之如家人教以耕織為製其器解官後囊無一物焉

劉璽字爾符號三峰順治丁亥進士知烏程縣剔釐姦弊龔服豪強漕糧立倒廩法他縣多仿之擒治大湖巨盜親搏戰水上獲渠魁白花蛇沈三即弊之獄羣盜震懼不敢止五百里內廉幹名傾兩浙長興歸安同時缺令民爭求璽鬪於府治歸安民奪肩輿去乃定古文辭置之歐曾集中巧眼不能辨也著有鑷山集

張好奇字知天綸音子順治壬辰進士初知鞏縣歷陞提學
僉事鞏黃灘水口因民暫耕遂起額稅然時輒沒入河稅
不得脫好奇請三年一丈以地有無為存豁鞏民德之尤
慎刑獄全活甚多以為動關人命死生立簿自記功過元
日告天焚之

王建常字仲復號復齋之寀從子父之寵鎮撫散官少為諸
生後棄去銳意聖學於六經子史濂洛關閩之書無不詳
究年近八十家貧常不舉火而泰然自得造次決於禮教

授生徒足不入城市華陰王宏撰稱為泰山巖巖晚年造詣純粹有光風霽月之度戶曹張柟通籍後始拜其門自言不遇先生幾枉一生吳縣顧炎武博雅冠天下數以疑義相質學使許孫荃造廬持金幣為壽辭不受贈以詩不答題其門曰真隱其學以主敬存誠為功窮理守道為務生平尤致力於小學前輩以為關學自橫渠後的派真傳當推建常為第一著有小學句讀記大學直解書經要義春秋要義太極圖集解律呂圖說復齋錄四禮慎行錄兩

論輯說詩經會編忠誠錄復齋別錄復齋日記餘稿諸書
皆手書細字端楷一筆不苟云

張柟字讓伯順治乙未進士少不羈質直剛果毅然要做天
下第一流人事知巴縣力變舊政陞戶部主事猶清貧不
能自給著有質言二卷皆言政事設施及聖賢修身省心
之要

張召南字文仲順治辛丑進士知安福縣西鄉連山阻遠民
刁抗不供賦召南單騎往諭以大義民咸感泣輸賦為各

郡最康熙甲寅耿逆叛召南赴省請兵未至城屢陷歸馳
至境內招集鄉勇令健僕率以攻賊遙為聲援於外賊乃
踰山而遁遂復安福入城招撫偽官五十七員難民萬餘
人令耆老勸諭開墾荒田凡二千頃陞中書舍人

王在亶字信之皞如季子少孤事母至孝尤好義負欠者數
十家悉焚其券

郭治字完我康熙辛卯舉人任雲南寶甯知縣多惠政善察
人私隱民不敢為姦性豪邁遇事敢為羣頌其德

王人瑄字璧六康熙辛卯副貢任高臺縣教諭方嚴有守其
啟迪多士必以器識為先而才藝為後其造就者皆成名
儒

徐渤字學海號又拙康熙甲午舉人山東栖霞縣知縣先有
邪教株連逮繫累累渤蒞任為別其首從定罪力請於上
官得末減者甚眾至開徵令民自封投櫃杜漁侵革耗羨
絲毫無所染民為建清廉碑以頌德

張嶙字景山號覺菴歲貢生峭直磊落恥為柔佞之行家法

整肅家人未敢有犯者教二子發祖懷祖成名喜排難解
紛濟困扶危鄉人受其庇者戴德不衰

張發祖字孝舒號西濱康熙辛丑進士官禮部主事自少嗜
學勵志聖賢言動必循禮法無所苟且為人一主於敬平
生無所著述惟以身體力行為主嘗曰得尺行尺得寸行
寸乃為實學儀容斂抑退然若不勝衣而剛毅有守有確
乎不拔之節居官九載清操卓立艱苦之狀寒士有所不
堪林下三十年閉門課讀不為衣食計家屬困館穀常以

給親舊之貧者身雖浣衣濯冠晏如也其內重外輕類如此

劉峒字星柱號筠石璽長子康熙戊午舉人嗜學忘寢食歲
饑累日不火食猶讀書不輟至困仆啖蒺藜糠覈餅得不
死時當事諱災峒力請報聞簡牘頻煩切至及朝命大臣
勘賑又呈災狀除鄜州教授不就著有大中正義等書數
十卷弟岫己卯舉人亦有名

關中俊字遜伯慕馮恭定之學事二親以孝聞居喪以禮不

為浮屠事著有巢居野人集鶴陰鳴和集

王辰字公黼號梅齋少穎慧父商於南水濱徒跣千里求
屍不得號泣歸途抱恨終天遂絕意仕進雷柏林李河濱
皆重之

張五經字翊書歲貢生經明行修淡於仕進閉戶窮經口不
絕吟手不停披士林宗之膺鄉飲五次著有大易彙解

上官汝恢字端伯號果齋歲貢生有孝行以義服人里無爭
訟常推田畝以窶貧不能葬者善教誨成人材進士趙蒲

受業其門其子德輿雍正壬子冠於鄉雍正五年保舉賢
良方正辭不就邑令楊臚賜顏其門曰理學名儒

麻居湄字交叔雍正癸卯進士授陽武署鄭州兼攝上北河
同知歷任勤勞寬催科慎刑獄修文廟城池設義學捐賑
饑民數千人又捐給牛種凡墾報數百頃以病歸居家孝
友壬子歲歉出金散給鄉鄰貧乏者

安養哲字既明號保亭雍正癸卯舉人性孝友英敏嗜古文
學任廣西隆安縣令地素瘠薄俗甚狡險哲至革陋規懲

姦剔弊禮士勸農人咸德之開渠引江水灌稻田數百頃
隆民稱永利馬上憲嘉其能屢委訊結鄰邑巨案嚴拒賄
賂粵西學使羅公以道義文章為忘形交謂學問純粹操
守清潔書翰有晉人風

上官有儀字公度雍正丁未進士才識明敏有守有為任山
東齊河縣知縣理滯獄端士風嚴行保甲姦宄無所容御
民一以誠信縣大治擢戶部主事綜覈詳慎最有能聲

趙淵字子靜號龍溪乾隆丙辰舉人任江西瀘溪縣令甫下

車適逢歲歉因偏災格於例不得上請即出己資二千金
稍紓民困每屆春則攜羊酒出郊以勞農人且繪勸農圖
既調南城瀘人挽留不得遮道焚香者不絕及治南緩催
科絕苞苴慈惠清廉口碑載道卒於官白衣冠而送者數
千人

趙蒲字廷璧號毅齋乾隆丁巳進士知四川儀隴縣令重修
文廟日與士子講學文教振興為治一以薛文清公從政
名言為法循

劉昱字汝正號覺軒璽曾孫雍正己酉經魁登乾隆丁巳明
通榜授府谷縣教諭訓課有方文風丕變紳民感戴告歸
後多年猶有不遠數千里而來訊者平生博極羣書自經
史子集以及易象卜筮無所不通尤精岐黃家言為文章
喜純正在籍十餘載卒未嘗一入城市廉靜端方不愧清
白家風云

張愉字子言歲貢生品高行卓學問淹雅與羣季子弟輩友
愛篤至殷勤率導不遺餘力嘉惠後學惟恐弗及自奉儉

早行

樸心存惠愛能任人託孤捐粟賑荒輸金助役不一而足
邑令先後至者皆高其詣

王廷輔字公左號雲溪歲貢生任甘肅古浪縣訓導諭諸生
曰學者德行為本文藝為末倘名節有虧即學富才充亦
不見其不朽以故士子皆知恥自好守法奉公捐俸募金
創立書院又以其膏火束脩入正項交代俾勿壞自是古
浪人士敦師講學者多矣事繼母至孝待異母弟甚厚性
廉靜一介不苟著四書集註釋疑精書法善畫山水是文

與行固兼而有之

徐朝錦字萬龍歲貢生官甘肅靖遠縣訓導訓士嚴立條規
仿胡安定經義治事之法日與士子講貫嘗葬母族趙氏
之無後者七世十一塚人稱其義平生陶情詩酒不以得
失繫懷雖日不舉火處之泰然

楊卿雲字瑞廷乾隆丁酉舉人由大挑任蒼溪知縣地僻多
重案卿雲悉為平反調清溪縣毗連番境地瘠民寡值西
域不靖兵差浩繁卿雲立章程修廢舉隆報滿署南充縣

時教匪起，卿雲辦軍務，以積勞卒於官。衣不盈篋，斂服綫多綻裂。事聞，贈同知。

賜葬祭子廕縣丞

雷爾杰，字漢三，號毅齋。乾隆庚辰鄉榜第一，分發雲南署大姚縣。在任如寒時，視民如家事，勸農課士，息盜安民，燭姦若炬，嫉惡如仇，有神明之稱。終以亢直不合罷。

薛孟華，在金川軍營，由兵丁拔補甘肅涇州營外委，把總擒賊渠魁。乾隆三十九年，在當噶拉山梁勦賊陣亡。事聞，給

與祭葬卹賞銀兩入祀昭忠祠又祀本邑忠孝祠世襲葉
爾羌回城把總

劉繩武字繼先號洛濱乾隆己亥舉人少聰慧於經史子集
無所不窺方嚴古樸廉於取與無子臨終捐其田宅為先
祠祭田立義塾又捐數千金取息為邑鄉會者資斧及書
院膏火著有四書挾要春秋隨見錄正蒙管見

楊彥魁字子俊諸生純孝嘗對案食貪觀書誤以箸濡硯墨
汁淋淋滿口旁不自知也端謹質直不飲酒不觀優輯四

書諸家講義參酌折中顏曰釋疑

席友蘭字綺石乾隆壬子舉人歷任湖北羅田棗陽知縣所
至有聲後以事解任金陵總督孫寄圃聞其名聘主講寶
晉書院成就頗衆平生工書武昌黃鶴樓名人手蹟不一
友蘭書一聯豐采秀逸論者謂其冠絕古今一時名公碑
版勝地聯額多出其手偶爾裁答片紙尺幅皆足珍重焉
李元春字仲仁號時齋又號桐閣嘉慶戊午舉人大理寺評
事性穎悟精力過人少貧不能學一日過里塾聞誦書聲

喜告母始就學年十二三塾師講仁而不佞章苦思前後
諸章言仁不同及註語乃悟聖學求仁之要惟當理而無
私心非全體不息不足以當之二語為盡遂立志聖賢徧
求程朱書及父沒母老絕意仕進主講潼川華原各書院
教人以身心性命之學誠正為本而要於有恒講學必宗
程朱著述甚富詳經籍志皆扶世教正學術而不為空言
咸豐六年巡撫吳振棫奏請入祀鄉賢祠光緒元年學使
吳大澂奏請宣付

國史館列入儒林傳

張佑字乾伯嘉慶壬戌進士少聰明過目不忘於書無所不
讀善古文詞性過峻知福山縣僅五月即引疾歸嘗主講
關中書院著有都是春齋

霍樹清字松軒嘉慶壬戌進士砥學勵行矢志不渝由翰林
出宰歷劇縣以卓異陞南昌同知三署贛州在甘肅鎮原
革鬻地逾年復價之弊改甲首附里長賠累之苦賑平羅
紅水災躬自散給計口予錢民被實惠吏杜侵漁假歸里

置祭由設義學為受業師買田卹其後贛州會匪久為民
害拿獲四百餘人民賴以安訟多堂結不經刑名師卒祀
南昌名宦祠

柴毓叡字思堂嘉慶戊辰舉人讀書攻苦常衣不解帶名噪
一時仕固原州學正教士皆急敦品不責其贄肄業者益
衆興鄉飲修泮池捐俸增

聖廟燈及香燭之供前後州守道憲及提督軍門俱禮敬之上憲
保舉知縣不受遂陞教授為官十餘年未嘗挾家馬

劉重麟字仁趾初任永安州後累遷都察院右副都御史前
署臨桂縣代償虧庫項幾二萬補嚴州賑荒行分平糶法
大府下其制為各郡式在臺灣兼學政地多寶玉士子以
賄為常重斥之關白者風遂息在江西按察使值大荒有
漕糧八十艘建議借漕米以蘇民困奏下之日再為挪繳
大府然之民賴以全活為都御史彌補庫款請減外任大
員養廉一半又奏常平倉多虛設請核實買補積儲平生
俊偉光明毫無世俗骯髒態

馬大韶字虞操諸生少嗜學家貧授徒砥礪道學學日益進
志日益堅極善薛文清王復齋仍以朱子為主生平敦實
誼惡浮囂講古禮反時俗居喪三年不入內不葷飲葬祭
一遵家禮著朱子周易本義旁贊說詩貽笑春秋繪像孝

經述宗

李士式字子法嘉慶丙子舉人授廣靈知縣始至案牘堆積
蠹屋梁未逾月積牘頓清會大水傷禾捐俸賑之老病不
能就食者遣役送諸其室渾源州兄弟五人爭財致訟久

不決飭士式往勘士式作五子爭財歌有黃泉有爹娘爹
娘羞不語之句五人感泣訟遂息告歸載圖書數篋別無
長物

席光縉字雲占嘉慶己卯進士授直隸藥城縣地當孔道差
徭繁重斟酌裁汰民力用舒每歲秋獮清塵之車以千計
稟請減之善折獄牒甫投即訊之署萬泉有富豪某田數
百頃決河灌溉以數千金求立石光縉卻之仍相其地勢
令四圍均開渠灌溉詳府立案補吳橋修夷齊廟赤蜂橋

卒之日士民巷哭祀名宦祠

劉元孺字慕堂道光癸未進士歷官刑部郎中事繼母閤嘗
跪解其怒刑部有姦斃幼女一案獄已具元孺察其情自
鞫獲兇首一訊即服因派總辦秋審京察以知府用

雷五福字疇九道光癸巳進士知武邑縣創觀津書院捐俸
數千金為膏火資調交河以運河不時決傷民田捐俸築
隄防之民賴以安

吳應龍字雲樵道光甲午武榜眼授閩浙參將有名花會賊

依山濱海出沒不測應龍遣健夫五六十人為內應以兵
繼之擒其渠魁補慶遠副將楚匪竄入粵應龍率兵進勦
至貴州開泰縣遇賊數萬兵僅九百餘人應龍獲賊謀釋
之使以兵少告即檄催未至兵疾趨赴援賊有幻術應龍
令兵以巾裹米臨陣颺之賊目迷遂大破之旋擒粵匪李
志信斬之陞左江鎮總兵捐俸給餉破賊袁晚黃五善等
二萬衆斃首匪九名諭降張國梁後成名將授廣西提督
疊破潯匪李文茂等先後斬首八千盡殪其餘黨柳州慶

遠以次平咸豐辛亥賊復熾盤據諸險且廣設礮臺應龍
以所得賊之旗幟挺身先導直入其營賊不能辨遂斬其
渠魁餘悉走去後卒於柳州軍營

諭賜葬祭有加長子廕道銜應龍忠孝智勇本於天性出仕迎養
其父定省無缺父沒值伏臘哀痛不食尤好讀書經史兵
法戚少保紀效新書練兵實紀皆能成誦臨陣神色不變
故所向有功

李懷庚字西垣道光乙未進士性純篤歷署兩當各縣皆有

政聲補靖遠立文社設育嬰堂修城垣築河隄輯邑乘百
廢俱興陝撫林文忠公耳其名邀襄辦荒政升河州知州
州故回漢雜處懷庚恩威並用衆皆畏服後以勞累遷鞏
秦階道以功加按察使銜

董文煜字質生廷爵孫道光乙未舉人有至性授湖北當陽
縣有兄弟爭產者其兄以三百金求直文煜置金案上諭
以骨肉之誼兄弟感泣而去當陽地丁銀皆納以錢吏胥
因緣為姦文煜定章刊示宿弊以清調鍾祥粵匪突至分

股由東北門來城陷文煜走鄉募勇得一千二百人並飭
邑紳夏榮春等各帶數百勇急圖克復連攻五晝夜焚東
北二門督勇扒城首刃黃旗賊目一名賊遂潰生擒偽元
帥偽三王等正法時湖北全省盡為粵匪蹂躪無何賊又
大至文煜曰事不可為矣遂自縊巡撫胡文忠公林翼入
奏贈知府銜

賜葬祭銀子壙蔭州判

薛珊字鐵海性剛明歷任太原各府同知咸豐壬子調趙城

粵匪入晉至洪洞珊聞警即募勇修城繕器械防禦且曰
賊乘勝深入利速戰且彼意在太原吾能拒數日則韓侯
嶺以北防禦可備縱失守晉省可全其半不猶愈乎賊至
珊率衆以礮擊之鼓行而西賊疑援軍大至遂驚遁恒中
丞以守趙聞加知府銜署蒲州府濬修姚暹渠石塘灌田
十數村民甚賴之

閻敬銘字丹初號約盦道光乙巳進士由翰林累官戶部尚
書東閣大學士性廉介不諧俗尚孝友親睦雖昆弟分爨

已久後將之京盡以家財讓諸姪教子姓以正學即戶族
漸遠必自出脩脯延師以嚴督其功課嘗置義田贍族人
凡男女老疾之稍貧者皆按年給費不使或絀遇年荒必
自籌數千金以賑恤之不許一人食官糧嘗囑諸子謂沒
後喪祭必以禮毋得以音樂酒肉治喪事不用浮屠不收
賻儀卒如其言此外凡邑中有關民瘼籲懇憲恩之處亦
無不曲為裁成焉其歷任之政績詳

霍為茶字苑史樹清子道光丁未進士署綿竹髮匪藍大順
羣賊麇集守禦數十日要賊於路大敗之土寇方問子據
山聚眾為賊應為茶勦擒百餘人盜越嶺竄又教匪黃某
聚眾結寨為茶單騎入寨諭散其眾駱文忠公督蜀聞其
名令署成都公私旁午凡事皆身任之循聲大著調華陽
減差徭錢著為例署巴縣清釐訟牘署合州獲巨盜十名
升邛州加知府銜灌縣賊起率勇督防民得安集卒於任
入祀邛州名宦祠

王會昌字熾侯咸豐壬子舉人性純篤從李時齋學以造道
器許之師沒絕酒肉不與宴如守親喪送葬纓經執紼哭
甚哀事親孝父沒時值回匪亂會昌日夜守墓哭泣不輟
生平以道德文章為事著有祛疴齋文集

楊樹椿字仁甫號損齋諸生有志洛閩講求真切絕意進取
於名利泊如也事母至孝處兄弟待朋友懇惻直諒其為
學堅實刻苦默契精思養深而純守嚴而固晚年學益邃
邑宰黃照臨特設友仁書院延聘講學學使吳大澂以學

行疏於

朝略曰朝邑楊樹椿隱居華山潛心理學不入官府有古君子
風臣案臨同州知其所讀性理諸書融會貫通實有心得
平日涵養之功一本程朱主敬之學所謂篤行謹守不求
聞達亦足為士林則矣奏奉

諭旨加國子監學正銜

王庭杞字晉臣幼倜儻有大志以世亂講求武備同治壬戌
回亂土匪乘間起庭杞糾鄉勇立斬渠魁七人至澄城長

甯河擒斬回匪九人癸亥赴甯夏率難民精壯者禦回匪
於大瓦溝躍馬大呼瞋目而前連刺二人斬十餘級賊披
靡奔潰甲子庭杞遠居蒙古值將軍穆圖善師至聞其名
檄辦軍糧庭杞以餉不足自辭薪水以激勵士卒且多方
勸措軍食無缺敘勞得千總銜丁卯大軍破中灘賊巢賞
戴藍翎戊辰從將軍金順破王家疇保守備己巳古城清
肅賞花翎仍檄襄辦都統烏拉沁糧臺庚午甯夏平請假
歸里嗣聞賊復變急赴軍營至則沁已戰沒遂憂憤以卒

權執中字允之諸生回匪亂各鄉練團執中團兩宜鎮統衆

禦之為一邑稱最多忠勇公至邀執中運糧廊洛宜川兼

為鄉導後以母老辭歸築兩宜鎮寨居民賴之保教諭五

品銜以知縣用

附孝弟二十八人

明

照磨忽

麒盜廬墓三年不忍害

光祿署丞

王于豐天性孝友廬墓三年

大學生

王朝璽

事親養志廬墓三年

生員李

仁

廬墓渭溢負土築護

柴英才 曲意盡孝 鄉鄰豎碑

生 雷 捷 遠涉控讐 父弟尸還

畧陽 教諭 嚴思慎 愛弟情殷 盡讓父產

解國泰 七世同居 孝友雍睦

國朝

生 雷王賓 不茹菜果 三年哭奠

宋 斗 孝友性成 人言無間

生 張疇武 哀毀骨立 三年廬墓

趙天好 承顏順意 廬墓三年

生 劉世澤 孤幼申冤 建廟祀父

長山 訓導 忽以恒 情篤友弟 不留己業

生 張奠極 不御酒肉 廬墓三年

劉朝善 廬墓雙親 每食必祭

生 王元灝 孝名夙著 廬墓三年

陳效固

親疾嘗糞
祝神延年

党夢鼇

廬墓三載
未嘗歸家

薛國光

善事繼母
病祈身代

石振聲

衛兄捍亂
事同嚴父

恩貢

聶椿樹

學品無忝
怒怨不藏

朱作新

事親至孝
樂道終身

附義行三十人

明

劉宏禹

事親極歡
廬墓必祭

白士琳

善事繼母
刑于寡妻

蒙生芳

廬墓十年
造次弗離

楊鳳詔

守兄道範
敬如父師

党宰潮

有光庭訓
兼遠岐黃

生雷 員 珍 嗣 姑 復 子
留 產 歸 宗

王文美 賑 粟 數 百
克 昌 科 名

光祿 署 丞 王 于 豐 繼 父 義 行
名 著 三 秦

蘇濟舟 市 田 設 漿
歲 荒 掩 殮

朱志仁 拾 金 不 昧
慨 還 本 主

國朝

薛務本 八 世 同 居
勤 儉 治 家

魯爾良 同 居 十 世
門 內 肅 雍

雷 冬 輸 粟 賑 荒
不 吝 私 財

亓 遵 先 負 性 尚 義
慨 施 賑 粟

上 林 監 丞 王 于 鎬 見 義 必 為
與 兄 同 美

蘇 繼 祖 歲 歉 賑 麥
施 席 餓 孛

王 應 佩 同 十 一 世
食 指 八 百

張 文 英 無 善 不 為
義 著 鄉 里

閻文瞰 矜孤恤貧 全活無算

張珣 義感同室 捐匱助賑

謝正原 兄弟好義 鉅萬弗惜

生員 雷晟 留心行義 弗吝萬金

劉青照堂 搜行衆善 百萬不惜

同州 蒙天庥 積書萬卷 衆善廣行

張鏡 累世好義 賑饑無算

高希冉 兄弟樂施 善難悉述

張鵬 慷慨樂施 傾囊賑濟

候銓 劉大受 素擅周恤 馳名善人

李天彪 錢餅賑饑 施棺遷骨

副貢 王維戊 九世同居 人稱義門

劉化凝 置田設塾 數賑多粟

武鵬程 調貧賑饑 活人甚衆

生員 張星浩 賑粟千石 衆善必為

朱宗顥 施麥賑荒 毫無吝色

朱作賓 賑麥散錢
焚簿辭匾

附名宦祠

明

知縣王喬棟

魏傑

李英

蘇槃

縣丞卞禮

國朝

工部侍郎陝西督學道諡忠節葉映榴

知縣

羅人琮

附鄉賢祠

唐

右散騎常侍 嚴善思

明

監察御史 高翔

翰林院編修程 濟

山西布政司左參議喬 誠

直隸大名府通判程 範

蘇州府同知王 卷

福建按察司副使韓紹宗

兗州府知府劉 偉

山西按察司僉事王朝雍

太子少保兵部尚書謚恭簡韓邦奇

山西布政司左參議韓邦靖

浙江道監察御史忠孝雷士楨

監察御史嚴天祥

山東按察使王嗣美

刑部侍郎王之霖

應州知州王惟精

戶部員外郎李聯芳

大理寺少卿李朴

湖廣按察司副使張綸音

河南布政司參議李用中

直隸武清縣知縣韓倫

舉人雷于霖

國朝

保應縣知縣李楷

翰林院編修張孚貞

河南督學道張好奇

處

士

王建常

誥封通政大夫四川布政使司布政使銓道劉受

大理寺評事舉人李元春

附貞孝節烈

元

馬宅妻王氏

守節終貞
延祐旌表

明

劉烈女

甫字夫死
易服自經

張烈女

已字夫死
給母自經

李

烈

母弗能依
飲醜以死

吳

烈

流寇劫掠
大罵被害

劉烈女 恥字伶工 服毒而死

王亨妻靳氏 事親撫孤 誓不再適

羅詢妻党氏 盜殺夫子 號哭申冤

王思謙妻楊氏 撫孤食辛 奪嫁自經

韓登第妻高氏 舅姑逼嫁 棄子投井

國朝

劉烈女 聞夫為優 不食縊死

王烈女 夫死姑瞽 奔歸矢志

張三妻師氏 夫死守節 終身如一

楊專妻張氏 歲祲夫死 整衣投河

任世威妻閻氏 舅姑奪嫁 用刀自刎

何大慶妻翟氏 夫亡自縊 誓不獨存

石捷妻張氏 夫死拜姑 閉戶自縊

成烈女 夫死奔喪 改妝事姑

雷三喜妻李氏 過門未婚 夫死事姑

井七兒妻趙氏

夫出無音
娶守空閨

郭福學妻穆氏

夫出不歸
擇日迎婚

申祖志妻劉氏

夫疾婚娶
送死守貞

高汝槐妻李氏

請期夫死
嘔血以終

馮仰妻田氏

侍夫風疾
死亦自刎

孫崇樸妻薛氏

逼嫁脫歸
飲藥以死

張璠妻樊氏

夫亡痛哭
嘔血以死

何之英妻張氏

夫亡撫子
截髮附棺

李大策妻曹氏

甫卷夫出
終身守節

李長陞妻路氏

夫死始婚
事親無怨

嚴述堯妻張氏

夫死聞訃
新衣自經

趙逢酉妻孟氏

甫婚夫死
乘間自縊

仇玉慶妻王氏

請期夫死
七日而縊

王文祥妻張氏

拒污斷臂
雪冤即死

張頌音妻蘇氏

夫死了立
解衣市棺

麻淳然妻井氏

事姑教子
大節凜然

温如昆妻劉氏 夫患病死 扃戶投縊

楊永秀妻古氏 夫死哀痛 展轉氣絕

秦根管妻趙氏 力抵無賴 賊懼扼死

薛生文妻楊氏 拒污申冤 投井而死

田逢年妻麻氏 夫死兒冠 從容自縊

張丕煥妻胥氏 親沒事畢 入閨自縊

韓五鳳妻楊氏 服毒殉夫 志節不移

朱德馨妻楊氏 事親撫弟 姜班貞範

馬士順妻党氏 夫死懸梁 留姪縊麻

安治國妻張氏 夫死三年 奪嫁自縊

楊寅聲妻陳氏 正色拒污 閉戶自經

李含兒妻高氏 逼孀再醮 投井全節

張鸞鳴妻党氏 舅姑皆沒 鍵戶自經

張兆蓮妻純氏 事姑茹辛 焚香自經

霍勤炳妻王氏 夫死不食 三日即逝

朱續馨妻雷氏 捐軀殉難 玉潔冰清

張萬慶妻雪氏
嫁三日寡
白首冰霜

石烈

女罵賊被害
姊妹雙烈

人類

皆漢人無別種族

戶口

道咸時鄉里庶富戶口浩繁自同治壬戌回匪變起捻逆繼至以及光緒丁丑戊寅大荒賊傷餓斃者減十之四現在烟

戶貳萬壹千柒百柒十叁戶

男肆萬伍千捌百貳拾壹丁
女肆萬玖千壹百伍拾壹口
共男女玖萬肆千玖百柒拾貳丁口

氏族

泰安堡雷姓系出帝妃方雷氏因以雷為姓由馮翊遷居縣境至今傳十九代

趙渡鎮閻姓系出晉閻嘉之後元末由晉遷居縣境至今傳二十一代

韋林鎮霍姓系出武王弟霍叔之後因以國為氏元末由晉遷居縣境至今傳二十一代

五里鋪雷姓系出前漢郎中雷被之後見淮南衡山王傳宋時由耀州遷居縣境至今傳二十二代

龍門村劉姓系出陶唐氏劉累之後在晉為劉氏元末由馮
翊遷居縣境至今傳二十二代

西野鵲村楊姓系出春秋時晉武公支子姬伯橋五世孫羊
舌肸叔向食采楊氏其子伯石以邑為氏故號楊肸楊石
後黨祁盈滅族肸子孫逃於華山仙谷遂蕃衍於華陰為
關中著姓元順帝時江南安撫楊燧遷居縣境用楊寶放
鵲故事名村曰野鵲其孫楊恭明陝西布政使至今傳十

九代

北平羅村朱姓系出顓頊後裔封邾國楚滅之去邑留朱子
孫因氏焉屬沛國郡元末由晉遷居縣境至今傳二十一
代

貝家莊馬姓系出伯益賜姓嬴氏周孝王時造父封趙為趙
氏戰國趙奢封馬服君遂為馬氏元末由洪洞遷縣之許
村明中葉始遷居貝家莊至今傳十四代

迪村張姓系出軒轅第五子揮始造弦張網羅世掌其職由
晉遷居縣境至今傳二十二代

城內趙姓系出周造父為穆王御八駿馬後以有功封於趙
因氏焉元至正間由晉遷居縣境至今傳二十一代

南留社李姓系出李伯陽之後見風俗通元末由晉遷居縣
境至今傳二十一代

西平羅村翟姓系出墨子名翟因氏焉宋徽宗時由山西稷
山縣遷居縣境至今傳二十二代

倉頭村閻姓系出周後裔姬燮封於閻鄉因氏焉由晉遷居
縣境至今傳二十二代

宗教

士民悉遵 孔教信耶蘇教者盡住河東郝家莊王家莊等處教民共二十餘口


實業

自庚子辛丑凶荒連年民氣未蘇多耕畝畝少事詩書現在業士者柒百有奇

業農者肆萬壹千玖百有奇

業工者陸百有奇

業商者貳千伍百有奇



地理

縣境北枕廉山南臨渭汭右環洛水左繞黃河而河則東北
自龍門陡下洪濤急浪直奔西南趨縣境跨巽隅始蜿蜒而
轉東洛則自西北來又迤邐東南貫注域中而達於河朝坂
從東北西南隆起盤結於廉洛二界沙苑尤蒼蔚顯伏於渭
洛兩閒洵稱邑里之勝概乃吾全秦之咽喉而咫尺接壤者
則潼關直作口吻華嶽正當屏藩焉此固朝邑地理之大形
勢也

縣境南北九十里東西五十里

縣城在 京城西南二千一百里 在長安省城東北二百

七十里 在同州府城東三十里 在潼關西北六十里

縣城東至黃河五里 河道時變 又東至舊大慶關二十三里

此據現在

接山西蒲州界至蒲州府城共三十里

西至高城二十里接大荔界至同州府城共三十里

南至洛水十里又南至渭水三十里接華陰界至華陰縣城

共六十里

北至金水五十里接邵陽界至邵陽縣城共一百里

東南至望仙觀南三十里接華陰界

東北至洿谷五十五里接邵陽界

西南至沙苑十里又西南至仁義村三十五里接大荔界

西北至西平羅西莊村四十五里接澄城界至澄城縣城共

百里

城內有 文廟

城隍廟

雙忠祠

明高翔
程濟

三烈祠

明劉

李張三烈女後
凡節孝附之

王公祠

本朝邑令
王兆鼇

吳起二石獅

考院

初等小學堂二

境內分十四巡警局

中局在治城內轄四街兩關二十一村 東黃河西伯士

局南饒益局北安仁局

內有春秋王城 漢沙橋今為寺後周長春宮 三皇廟

唐金龍寺 嚴譔祠墓 宋敕建東嶽行祠即崇佑

觀 元王由義墓 明程濟故里 韓恭簡公墓 秦

安堡 雷于霖墓 本朝閻文介公專祠 五先生祠

明高翔程濟韓邦奇
本朝王建常李元春
文介公墓
新大慶關稅課局

釐局
南寨豐圖義倉
高等小學堂一
初等小學

堂一

舊大慶關局在治城東二十八里轄三街五村
東蒲州

界西黃河南黃河北黃河

內有 春秋蒲關 戰國臨晉關 漢唐蒲津關 韓

信陳兵處

秦浮橋

以上今皆無存

唐鐵牛浮橋

西牛被河衝東尚存

宋大慶關

漢河瀆祠

今廢

大禹廟

太公廟

水利廳

初等小學堂三

伯士鎮局在城西十五里轄一鎮二十八村 東中局西
大荔界南韋林局北安仁局

內有 戰國吳起廟 漢高陽城 唐乾坑 明周彘
墓 初等小學堂一

新市鎮饒益局在城東南十里轄一鎮九村 東黃河西
伯士局南安良局北中局

內有 漢高祖廟 南梁及唐饒益寺 明韓邦靖墓

初等小學堂一

兩女鎮兩宜局在城北四十里轄一鎮十九村 東烏牛

局西雙泉局南安仁局北大定局

內有 兩女廟 保真觀 明王學謨墓 初等小學

堂一

趙渡鎮安良局在城東南十五里轄一鎮三街 東黃河

西永清局南洛水北饒益局

內有 城隍廟

洛水渡

舊每年冬作橋梁今廢

閻文介公故里

望仙觀永清局在城東南二十五里轄十二村 東黃河

西韋林局南華陰界北饒益局

內有

春秋河曲

今河
侵沒

漢望仙觀

漢武帝廟

隋永

豐倉

宋敕建城隍廟

淨安寺宋崇甯鐘

明王三

省墓

王之寀墓

本朝王建常墓

金龍渡

初等

小學堂一

營田莊烏牛局在城東北四十里轄二十二村 東黃河

西兩宜局南中局北大定局

內有 春秋老人結草抗杜回處 唐劉幽求塚

白池村大定局在城東北五十里轄十五村 東黃河西
飲至局南兩宜局北邵陽界

內有 春秋剗首 元郭平章干社寨

韋林鎮局在城西南三十五里轄一鎮十八村 東永清
局西大荔界南華陰界北伯士局

內有 太白池 麻子池 蓮花池今為風沙沒 北周沙苑

城 隋唐馬監 宋牧龍坊以上皆廢 安靖寺 本朝李楷

墓 李元春墓 初等小學堂十二

安仁鎮局在城西北二十里轄一鎮四十八村 東烏牛

局西大荔界南伯士局北雙泉局

內有 春秋輔氏城 唐小鹽池後廢通靈陂 白馬將

軍扈鏢塚 元巉巉子山石刻 明劉偉墓 王學古

墓 本朝劉璽墓 初等小學堂三

大夫村永定局在城西北三十里轄三村 東兩宜局西

安仁局南安仁局北兩宜局

內有 唐雷萬春故里

雙泉鎮局在城西北四十里轄一鎮十八村 東兩宜局

西大荔界南安仁局北飲至局

內有 五泉

北魏以此名縣 隋豐羊牧

以雙泉飲羊肥而不羶唐廢然局南南北十里

東西數十里土皆斥鹵水不能飲十種九空農頗苦之

明高翔故里 陝西布政

楊恭墓 楊樹椿墓

王彥莊飲至局在城西北五十里轄十一村 東大定局

西澄城界南雙泉局北澄城界

內

境內編三十三里 大約以地丁銀百兩為甲十甲為里光
緒十六年清丈地畝後共編三十三里曰

城關 豐潤 沙底 南陽 迪村 韋林 倉西 大

慶 大夫 趙渡 隄澆 步昌 干村 上辛 雷村

寺子 龍泉 白池 高明 兩宜 平羅 湘底

安仁 龍門 顧賢 官莊 西莊 太平 高陽 伯

士 新開 新進 永新

鐵廉山一曰長虹嶺曰許原曰高原曰商顏見漢書溝洫志
在本縣治城之北五十里當飲至雙泉大定兩宜四局所轄
地其山橫亙大荔朝邑兩縣西盡荔境絕於洛東入本境五
十里絕於黃河其折而西南者經烏牛安仁與中三局過縣
城西轉正南六十里曰朝坂曰彊梁原曰華原山以朝日光
射層崖疊岸煙景萬狀又折而西經伯士局二十里曰紫陽
山亦以形如華原且當洛北然統一朝坂也西魏之名朝邑

縣者實取諸此乃朝夕之義非朝廷之謂北距廉麓四十餘

里南距洛十里東瀕河登高俯仰一攬無餘襟太華腋中條

帶洛渭嶽色河聲畢湊几席斯固秦漢之所以置臨晉而後

周隋唐之建離宮特以河山毓秀四時不枯名曰長春且沙

苑突現於洛陰據伯士韋林二局縱十餘里橫二十餘里西

跨大荔渭南二縣境五十餘里中之沙阜似崗巒周圍井園

繡結蔥翠滋潤又若沛澤斯亦中土所罕觀而西北雙泉局

廉谷之蔡莊湘底雙泉西莊五泉

舊有太奇泉今枯然泉仍足五

與西南韋

林局沙苑之麻子蓮花太白三池遙相掩映然惜皆夏潦冬涸略供炊爨難資灌溉沙直不能耕苑亦夏畦之病洛渭無利於農而河且為人患是以地瘠民困而末如之何也已

水

黃河發源崑崙曲折東流至甘肅北出塞經河套而入長城南流為秦晉兩省天然分界初抵榆林府府谷縣東三十步入省境黃甫川自東北來注又南經神木縣東百二十里又南經葭州東一里葭蘆川自西來注又經綏德州吳堡縣東

一里又經又經綏德州東百二十里又經清澗縣東百二十里無定河自北來注又經延安府延川縣東七十里又經宜川縣東百里又南至龍門山北入府境錯開河鬱水南谷水皆自西來注南經韓城縣東十五里濂水合離洳澗漑潦澮芝七水自西北來注又西南經郃陽縣東三十餘里百良水橋頭水瀆水皆自西北來注又河中有飛浮山出沒不時又西南自縣東北隅五十五里大定局所轄之澇谷村東十里始入縣境西南流十里至烏牛局所轄之北延壽村東金水

自西北來注仍西南經烏牛局東五里流五十里經縣城東
五里經饒益安良二局東最逼近舊大慶關局西十三里流
十五里至趙渡鎮南洛水自西南來注更南流經永清局東
至望仙觀南轉西十五里渭水自西微北來注又南五里接
華陰縣界若河之東則自龍門下經山西河津滎河臨晉三
縣之西永濟縣之西南由此乃折而轉東流經潼關城北潼
水自南穿城來注遂直東出本省入河南山西兩省境界河
本可行大船但自龍門甫下數百里怒濤激浪忽刷淺水之

沙而驟深忽淤深水之泥而猛淺每遭覆舟滯船之害惟吾
縣境內更可慨者數十年來水勢汎濫西侵沒民莊田日甚
一日不可勝紀矣

渭水發源甘肅蘭州府渭源縣西烏鼠山溯自秦州西來東
至鳳翔府隴州西南百里入省境又東經寶鷄縣南一里沂
水自北來注又東經岐山縣南三十里又東經郿縣北三里
又經西安府藍屋縣北五里漳漆二水自北來注韋谷強谷
觀音渠三水自西南來注駱谷黑水田谷赤谷四水自東南

來注又東經興平縣南二十里耿谷甘谷二水自南來注經
鄠縣北三十里又東經咸陽縣南一里潦水泥渠水自西南
來注灃水自東南來注經長安縣北三十里又東經咸甯縣
北三十里滻灃水自東南來注又東經高陵縣南十里涇水
自西南來注洪沙渠自西北來注經臨潼縣北十五里水磴
潼臨三水自西南來注戲水市谷水自東南來注漆沮清谷
三水自西北來注又東經渭南縣北一里冷水杜化谷水瀟
水自西南來注明光谷西陽大赤三水自東南來注又東入

府境經華州北十五里赤水仙橋水石隄水自西南來注太平水自南來注羅紋水疎水構峪水自東南來注經大荔縣南三十五里又東經華陰縣北二十里蔥谷水敷水良餘水黃酸水仙谷水自西南來注長澗小澗大澗水自南來注蒲谷水小月溝水自東南來注遂入縣境自縣西南隅四十五里韋林局所轄之仁義村西南來東流三十里北距縣城三十里至永清局望仙觀南入河其水寬淺可行中等之船然其勢日北侵沒民莊田已甚矣夫

洛水發源甘肅慶陽府合水縣白於山東南流入省境經延安府保安縣西百里又南經安塞山西北百二十里又西南經甘泉縣西百步又東南經鄜州東百步一名洛交水又名三川水又南經洛川縣西南七十里又南經中部縣東北三十五里又南經宜君縣北八十里又東南入府境經白水縣東三十里鐵牛水自西北來注孔走水自東北來注又東南經澄城縣西二十里既安城南水洞子崖水長甯水自東北來注白水自南來注浴子水自東來注又南經蒲城縣東西

十里甘泉水大谷水自東北來注又西南轉東南經大荔縣西南五里又東入縣境自縣西微南二十二里伯士局所轄趙家莊西來東南流經饒益安良二局三十五里北距縣城十里更南至趙渡鎮南入河其水但行小船恆不用棹僅以繩引耳

金水更纖泉細派發源郃陽縣西北壺梯山東南流入縣境自縣東北隅五十五里大定局所轄澇谷村來邑令朱廷模志引春秋左傳文公七年晉敗秦師於令狐東南流十里至烏牛局所轄至於剗首云即澇谷未詳是否

北延壽村東入河蓋夏時或猛漲為害而冬則極微者也

道路

自縣城東路至黃河心十里又東渡河至嚴家莊十里又東
過舊大慶關至山西蒲州府十里西路踰華原山至焦家莊
十里又西踰紫陽山至高城村十里又西至同州府十里南
路渡洛水至沙苑十里又南經沙苑至洎村十里又南至倉
西村十里又南渡渭水至東柵村十里接華陰界北路上朝
坂至隄澥村十里又北至魯坡村十里又北至寄樓村十里

又北至兩女鎮十里又北踰廉山至葫蘆莊十里接邵陽界

物產

動物

畜有馬牛

本境不足全賴他境

犬羊豕雞

魚有魴鯉

製造皮衣皮繩

略給家用

植物

木有榆柳槐柏

果有桃杏棗柿梨

藥有麻黃香

附柴胡防風無多

蔬有蔥韭菘蒜芥百合山藥蘿葡

葑紅薯落花生

蔬有西瓜瓠瓜

穀有麥豆穀糜

自食時不足

服有木棉

絲甚少

製造棉布
僅自給

鑛物 無

商務

向無大商近年惟所出之棉花尚可成莊北路運至宜君洛川西路運至寶雞虢鎮棗旺無恆皆外來客自行運販每歲約出三十餘萬斤陸運



